



La Compagnia Rossini es cuntshainta fin dalöntsch sur ils cunfins dal pajais oura: Els han dat concerts a Lucerna, a Frankfurt, a Prag, in Portugal ed han fat turneas tras l'America.

FOTO P. DE JONG

## La Gurlaina as transmüda in ün'opera

La Compagnia Rossini a Scuol

■ (anr/mfo) Als 30 gün as preschainta la cuntshainta Compagnia Rossini a Scuol. La halla da glatsch Gurlaina vain transmüdata per quella preschantaziun in ün'opera. Il palc vain imbelli d'üna culissa pitturada da l'artist Rudolf Mirer – la halla vain decorada in tuots möds per cha las chantaduras e'ls chantadurs as pon preschantar in ün'atmosfera unica. Las s-chars 40 artistas ed artists da la Compagnia Rossini da la Surselva vivan daspö bundant 20 ons pü o main be pel chant e la musica. Dürant quist temp vegnan els scolats e «glimats» a chantaduras e chantadurs d'ota qualità. «Glimar» perquai cha Armin Caduff, il fundatur e manader da la Compagnia Rossini, annöblischa sco ch'el disch «ils diamants crüjs a diamants glimats». Cun diamants manajal las vuschs da las chantunzas e dals chantunzs. Giö da tuot daja in Surselva blers da quist diamaints: Tant las 16 interpretas ed interprets dal «minz da la truppa» sco eir las ulteriuras 17 vuschs da l'ensemble sun per gronda part sursilva-

nas. La Compagnia Rossini es cuntshainta fin dalöntsch sur ils cunfins dal pajais oura: Els han dat concerts a Lucerna, a Frankfurt, a Prag, in Portugal ed han fat turneas tras l'America.

La Compagnia Rossini es adüsada da's preschantar a gronds publics. Eir a Scuol dess quai esser il cas: Cun excepziun d'üna pitschna ustaria, la quala as rechatta in ün chantun da la halla, vain quella implida cun sopchas. I vegnan spettadas almain 500 personas chi vöglan giodair las preschantaziuns unicis. Organisà il concert han ils respunsabels da la halla da glatsch Gurlaina. Cha grazcha al sustegn da sponsuors indigens sajan ils predschs d'entrada al concert moderats. Chi's vöglia avair a la fin üna halla plaina e pudair spordscher a tuot la populaziun la pussibilità da far part da quist evenimaint special.

Il concert da la Compagnia Rossini ha lö als 30 gün a las 20.00 illa halla da glatsch Gurlaina a Scuol. Las portas d'entrada sun avertas a partir da las 19.00. La prevendita da bigliets d'entrada ha lö pro'l büro d'informaziun a Scuol.

## Inquilins (bod) invisibels

Leivra alva e ravulauna, il tema principel da la «Cratschla»

■ (anr/lw) La nova «Cratschla» es dedicheda als artists da's render invisibels, que vuol dir a la leivra alva ed a la ravulauna. Intaunt cha'ls visitadurs dal Parc Naziunel s'allegnan pel solit da pudair observer tshievrs, chamuotschs u giruns, vuol que ün bun ögl per river da vzair üna leivra alva u üna ravulauna. La leivra alva (*Lepus timidus*) viva i'l god, aint illa zuondra ubain sur il cunfin dal god illa grippa, as legia i'l nouv numer da la revista dal Parc Naziunel Svizzer, illa «Cratschla» 1/2007. La sted es sieu pail grisch-brünaint, l'inviern – cun excepziun dals pizs da las uraglias – alv scu la naiv. Activa es la leivra alva surtuot la not u a bunura fich bod, da maniera cha'd es difficil da la vzair. Ün'otra inquilina da la zona otalpina chi nu s'expuona gugent es la ravulauna (*Lagopus mutus helveticus*; in valader: amblana). Sieu pennam s'adatta tuot tenor stagiun a la culur dal terrain. Ella viva sur il cunfin dal god in giandas ed in lös inua cha crescha poch – in lös cun buna vista e cun bunas pussibiliteds per as zipper.

Tant la leivra alva cu eir la ravulauna velan scu exaimpels per bes-chas chi s'haun adattedas in ün möd optimel a lur ambiain e chi haun sviluppo strategias raffinedas per surviver. Traunter oter rinvieschan *Seraina Campell*, *Flurin Filli* e *Hannes Jenny*, ils autuors da las contribuziuns, a las strategias per spargner energia in ün muond fich crüj. Tar la leivra alva cumpiglia il pail d'inviern ajer impè da pigmains, da maniera cha la perdita d'energia vain redüta per 30 pertschient, as legia. A listess mumaint serva natürelmaing il pail alv a render la leivra praticamaing invisibla illa naiv. Tar la ravulauna es mincha penna munida cun üna seguonda pennina (da flamma) per la proteger dal fraid.

### Viver in «iglus» ed ir cun «gianellas»

Las ravulaunas – e per part eir las leivras alvas – as chevan aint illa naiv, chi tegna chod scu ün iglu a l'Eskimo. Cha eir cun temperaturas considerabelmaing suot nolla rivan ellas uscheja da s-chuder sü la temperatura in lur cuvel sün sur nolla gros. Per chaminer respectivmaing cuorer sün la naiv dispuonan tuottas duos bes-chas da «gianellas», scrivan ils autuors,

dimena da pattas fich grandas respectivmaing da peis cuvierts cun pennas lungias. A quists peis rinviescha dal rest il nom scientific da la ravulauna. Cha «Lagopus» vögla dir «quel culs peis da leivra». Ultra da quai vegnan las griflas da la ravulauna d'inviern 17 millimeters lungias (la sted 9 millimeters), da maniera ch'ella po chaminer sün la naiv sainza sglischir scu eir la sgratter sü per chatter nudritüra.

Per trer a nüz la nudritüra il pü bain pussibel haun taunt la ravulauna cu eir la leivra alva ün bögliet lung. La nudritüra resta lösch aint il bögliet e vain digerida plaun. La leivra alva maglia ultra da que sieus excremains üna seguonda vouta. Ils excremains – e tar las ravulaunas lur chaunt – sun ils indizis chi tradeschan la preschentscha da las bes-chas. Cha surtuot da prümvaira e d'utuon, cur ch'ellas vaun in chalur, as possa minchataunt observer ravulaunas, i'l PNS per exaimpel sün La Schera u Murtaröl, as legia.

Chi sun e che faun ils giasts dal PNS? Ultra da quist tema principel vegnan preschantos illa nova «Cratschla» eir ils

resultats da retscherchas fattas dal 2006 in vista als 150 000 giasts chi frequaintan minch' an il PNS. Ils giasts svizzers – dal 1993 üna quota da 61 pertschient – s'haun augmantos a 78 pertschient. Ils Tudaschs percenter s'haun diminuies da 20 a 12 pertschient ed ils Taliauns da 7 a 3 pertschient. Scu cha's vain a savair es per 73 pertschient dals giasts il PNS ün motiv important per tsherner l'Engiadina scu lö per passer las vacanzas. Ultra da que peran giasts dal PNS dad esser giasts chi chaschunan üna gronda valor agiunta.

Pernotter pernottescha üna gronda part dals giasts a Zernez (passa 25 pertschient). A Scuol pernotteschan passa 15 pertschient, a Zuoz, S-chanf, La Punt-Chamuesch e Puntraschigna 4 fin 5 pertschient ed illas ulteriuras vschinnas da l'Engiadina e da la Val Müstair main cu 4 pertschient. Interessant es il svilup dals giasts chi viagian culs mezs dal trafic public daspö l'avertüra dal Vereina. La quota s'ho augmantada da 13 a 23,5 pertschient.



Il pennam da la ravulauna s'adatta tuot tenor stagiun a la culur dal terrain – quist e bger oter as po ler illa nova «Cratschla».

FOTO L. WALTHER

reclama

**Fielmann: Günstig ist gut, garantiert günstig ist besser.**

Fielmann präsentiert Ihnen die ganze Welt der Brillenmode – zum garantiert günstigsten Preis. Denn er gibt Ihnen die **Geldzurück-Garantie**. Sehen Sie ein bei Fielmann gekauftes Produkt noch sechs Wochen nach Kauf anderswo günstiger, nimmt Fielmann die Ware zurück und erstattet den Kaufpreis.

**Brille: Fielmann.**

Moderne Komplettbrille mit Einstärkengläsern und 3 Jahren Garantie für **CHF 47.50**

**Fielmann**  
www.fielmann.com

Brille: Fielmann. Internationale Brillenmode zum garantiert günstigsten Preis. Mehr als 500x in Europa. 25x in der Schweiz. Auch in Ihrer Nähe: Aarau, Baden, Basel, Bern, Biel, Burgdorf, Frauenfeld, Freiburg, Genf, Langenthal, Lausanne, Luzern, Olten, Schaffhausen, Solothurn, St. Gallen, Thun, Wil, Winterthur, Zofingen, Zürich, Zug und **Buchs**, Bahnhofstr. 39, Tel.: 081/750 52 52; **Chur**, Quaderstr. 11, Tel.: 081/257 07 80; **Rapperswil**, Untere Bahnhofstr. 11, Tel.: 055/220 13 60.